

# **Акафист святому благоверному великому князю Георгию, Владимирскому чудотворцу**

## **Кондак 1**

Избранный угодниче Христов, благоверный княже Георгие, возсиявый миру, яко звезда богосветлая, святостию и чудесы твоими, приими похвальная пения любовию чтущих святую память твою и со сродники твоими, святыми князи Андреем и Глебом, моли Христа Бога сохранитися неврежденным нам от видимых и невидимых враг, да со умилением вопием ти: Радуйся, святой благоверный великий княже Георгие.

## **Икос 1**

Ангельское житие возлюбив от юности и ко исканию единого на потребу направив помыслы твоя, княже Георгие, дивный образ был еси добродетелей христианских и совершенства духовного; темже и возвеличен был еси на земли пред братиею твоею и на небеси прославлен еси от Господа. Сего ради славяще, зовем ти сице: Радуйся, богоизбранный княже земли Российския; Радуйся, пречестная отрасль равноапостольного князя Владимира. Радуйся, святости князя Андрея Боголюбского подражателю; Радуйся, благоверия князя Глеба наследниче. Радуйся, яко тобою град Владимир украшается; Радуйся, яко Бог в тебе дивен является. Радуйся, святой благоверный великий княже Георгие.

## **Кондак 2**

Видение преславное Богоматере, бывшее благочестивому сроднику твоему князю Андрею, и множество чудес, явленных от чудотворных иконы, укрепиша в глубине юных души твоя, святе Георгие, пламенную любовь ко Господу и усугубиша святые подвиги твоя. Помози убо и нам, святче, добродетелем и любви твоей последовати, да благоприятно воспеваем Богу: Аллилуиа.

## **Икос 2**

Разум пленивый в послушание вере, богомудре, с молитвою и благоговением приял еси жребий служения стране твоей и, стяжав божественную благодать, всем был еси в нуждах скорый помощник и покровитель; темже ублажаем тя, святой княже, и, славяще Божие о тебе промышление, вопием ти: Радуйся, Отечества нашего ревностный защитниче; Радуйся, православия поборниче. Радуйся, христианского благочестия блюстителю; Радуйся, милости и помощи нуждающимся подателю. Радуйся, яко тобою вернии просвещаются; Радуйся, яко прославляяй тя чудесы Бог тобою всех к себе призывает.

Радуйся, святы́й благоверный великий княже Георгие.

### **Кондак 3**

Силою молитв и благодати Божией подобен был еси, святе Георгие, благоверному князю Глебу, принесшему все житие свое в жертву Господеви, и твоим смирением удивил еси сродники твоя, хотящая лишити тя великокняжескаго стола властолюбия ради. Сего ради дивно прослави тя Господь, Емуже предстоя со Ангелы воспеваеши ныне: Аллилуиа.

### **Икос 3**

Имея велию веру и любовь к Господу и соблюдая божественная словеса Его «да любите друг друга», ты, святы́й княже Георгие, яко пастырь добрый, не восхотел еси мстити присным твоим, но кротостию обличая их, с любовию увещавал еси сохранять мир в сердцах своих. Темже убо величающе смирение твое, взываем ти сице: Радуйся, любовь Христову себе стяжавый; Радуйся, люди, врученныя свыше скиптру твоему, добре управивый. Радуйся, гнев на ближняго до конца в себе умертвивый; Радуйся, уста своя от клеветы заградивый. Радуйся, яко тобою всякая вражда и злоба побеждаются; Радуйся, яко от Бога и человек достойно возлюблен был еси. Радуйся, святы́й благоверный великий княже Георгие.

### **Кондак 4**

Бурю бед и скорбей претерпел еси, святы́й княже Георгие, егда брат твой воздвиже брань на тя и, встав со многими полчищи, на изгнание тя осуди; незлобиво восприял еси чашу поругания, богомудре, и скорбь не возможе поколебати храмину души твоя, основана бо бе на твердем камени веры во Христа. Темже, дивящися величию терпения твоего, воспеваем к укрепившему тя Господу песнь: Аллилуиа.

### **Икос 4**

Слышаще многую хвалу твоему великому милосердию к бедным, святе Георгие, стекахуся к тебе мнози томимии гладом и обретаху вся потребная; воспоминающе дивная твоя благодеяния, смиренно молим тя, не остави и нас милостию твоею, испроси нам у Небеснаго Владыки земли плодоносие, от глада избавление, да непрестанно восхваляем тя сице: Радуйся, милости и сострадания преисполненный; Радуйся, страждущим в жизни сей сострадателью. Радуйся, беспомощным скорый помощниче; Радуйся, всем сущим в напастех милосердый заступниче. Радуйся, яко тобою немощнии сильни бывают; Радуйся, яко молитвам твоим Господь благоутробно внимлет. Радуйся, святы́й благоверный великий княже Георгие.

### **Кондак 5**

Боголюбивый угодниче Божий Георгие, восприяв великия скорби, и яко язвы Господа Иисуса на телеси твоём понесый, укреплялся еси духом при гробе святых сродников твоих, князей Андрея и Глеба, изливая пред ними печаль твою. Мы же, взирающе с трепетом на пречистыя мощи ваша, преклоняем колена, со умилением взывающе Богу: Аллилуиа.

### **Икос 5**

Видевше тя людие града Владимира, по речным струям в легкой ладии носящаяся и во изгнание из древняго града в страну Волжскую преселяющаяся, с сокрушенным сердцем и слезами к тебе устремишася; ты же, угодниче Божий, молился еси о них, благословляя их. Не презри и нас, прибегающих к заступлению твоему и воспевающих похвалы сия: Радуйся, дивную крепость духа в скорби показавый; Радуйся, терпением злобу мира сего победивый. Радуйся, яко всего себе в жертву за люди твоя принесл еси; Радуйся, яко Отечество твое от погибели спасл еси. Радуйся, яко заступлением твоим и ныне Царство Российское от междоусобных брани охраняется; Радуйся, яко предстательством твоим уповаем и мы от бед избавимся. Радуйся, святой благоверный великий княже Георгие.

### **Кондак 6**

Проповедника добрых дел явил еси себе, преблаженне княже Георгие; ты бо, ревнуя о благочестии, украшал еси церкви, христианом был еси покровитель, алчущим питатель, беспомощным и угнетенным защитник. Сего ради, надеющиеся на твое милосердное о нас попечение, усердно прибегаем к твоему заступлению, взывающе благодарственно Богу: Аллилуиа.

### **Икос 6**

Воссиял еси пречудно добротою души твоя, святой угодниче Христов, егда видя слезное покаяние князя, брата твоего, иже на одре смертном с сокрушенным и смиренным сердцем прощения прошаше у тебе, забыл еси вся козни его и понесенная тобою скорби и, облобызав его, обещал еси быти чадом его во отца и покровителя. Ублажая таковое истинно христианское братолюбие твое, вещаем ти таковая: Радуйся, брата твоего, враждовавша на тя, любовию Христовою возлюбивый; Радуйся, того на смертном одре прощением и утешением укрепивый. Радуйся, благая за зло воздавый; Радуйся, отеческую любовь вдовице и сирым обещаваый. Радуйся, яко дивный образ любви Отца Небеснаго к себе явивый; Радуйся, пример

братолюбия христианского и всем нам оставивый. Радуйся, святой благоверный великий княже Георгие.

### **Кондак 7**

Хотя Господь явити благодать Свою, дарова те бе, яко избраннику Своему, силу благоугождати Ему; ты же, святой княже Георгие, возлюбил еси Господа твоего всем сердцем твоим и всею душою твоею, и ближняго твоего, яко сам себе; явился бо еси сиротствующим чадам брата твоего воистинну покровитель и утешитель, споспешествуя благому устройению жития их. Сице убо яви милостивую помощь твою и нам, молящимся ти и поющим Господеву: Аллилуиа.

### **Икос 7**

Новое знамение благоволения Божия даровася тебе, святой угодниче Божий, егда Господь возврати тя на престол великокняжеский и прослави тя паче братии твоих. Темже, уповающе на святые молитвы твоя, молим тя, помози нам достойно ходити звания, в немже поставлени есмы, да поем ти сице: Радуйся, святых стратотерпцев Бориса и Глеба в Царствии Небеснем сонаследниче; Радуйся, святых князей Андрея и Глеба богоизбранный преемниче. Радуйся, в народоправлении велию мудрость проявивый; Радуйся, подчиненныя ти люди на путь благочестия направивый. Радуйся, яко молитвами твоими престолы правоверных царей утверждаются; Радуйся, славо и утверждение града Владимира. Радуйся, святой благоверный великий княже Георгие.

### **Кондак 8**

Странное и преславное чудо совершися в дивней победе твоей, святой княже Георгие, над нечестивыми враги, пришедшими от берегов Оки и Волги; с молитвою бо во устех и мечем в руке усмирил еси я. Сице избави ны от враг видимых и невидимых, брань на ны воздвигающих, и на правый путь спасения направи нас, да возможем воспевати Богови: Аллилуиа.

### **Икос 8**

Всего себе предав воли Божией, неутомимое попечение имел еси о стране твоей, защищая ю и укрепляя; многотрудное бо совершил еси шествие для устройства Нова-града низовския земли, идеже церковь во имя Спаса устроил еси и многия неверныя ко Христу привел еси. Темже славяще благоприятное твое о людех попечение, вопием ти: Радуйся, Новград на защищение Отечества от врагов устроивый; Радуйся, святыми храмы той украсивый. Радуйся, веры Христовы

усердный проповедниче; Радуйся, о спасении грешных теплый молитвенниче. Радуйся, яко имя твое доньше в Нове-граде прославляется; Радуйся, яко и на небеси славою и честью от Бога превознесен еси. Радуйся, святой благоверный великий княже Георгие.

### **Кондак 9**

Вси людие радовахуся, егда цельбоносныя мощи святаго стратотерпца Авраамия по повелению твоему, святой княже Георгие, несены быша из Болгарския страны во град Владимир; ты же, святой угодниче Христов, святителем Митрофаном и князи и всем священным собором, изшедше в сретение им, со умилением поклонение и молитву сотворил еси, зывая Господу Богу: Аллилуиа.

### **Икос 9**

Витии многовещании, от Рима посланнии, не возмогоша отклонити тя от Православной Церкви и правыя веры; ты бо, святой исповедниче Христов, рекл еси: паче умрети ми, неже православной веры отрещися, и тако суемудренныя учителя посрамил еси. Сего ради ублажаем тя, зовуще: радуйся, православныя веры непоколебимый столпе; Радуйся, Христовы Церкви стено и утверждение. Радуйся, велию православнаго исповедания тайну иноверным открывый; Радуйся, заблуждающихся в вере обличивый. Радуйся, яко тобою и ныне от ересей Церковь ограждается; Радуйся, яко твоим предстательством и град наш доньше в православии нерушимо пребывает. Радуйся, святой благоверный великий княже Георгие.

### **Кондак 10**

Спасти хотя страну твою от нашествия злых татарских полчищ, ты, святой княже Георгие, не усумнился еси оставити и дом, и жену, и братию, и сестры, и чада твоя; но ради спасения ближних твоих от погибели, яко истинный последователь Христов, живот свой положил еси, воспевая Господеви: Аллилуиа.

### **Икос 10**

«Царю Небесный, Утешителю души моя», — зывал еси, святе Георгие, на брани, весть прием о мученичестей кончине присных твоих и, подобно праведному Иову, преклонь колена, молился еси: «Да будет воля Твоя, Господи! Буди имя Твое благословенно отныне и до века!» Мы же, дивящися великому терпению твоему, во умилении зовем ти: Радуйся, образе вернаго служения Богу и Отечеству показавый; Радуйся, дивное отвержение себе спасения ради ближних твоих явивый. Радуйся, яко пострадати за имя Христово возжелел еси;

Радуйся, яко, мучеником подражавый, лику их сопричтен еси. Радуйся, яко пред великим мужеством твоим всяк возраст преклоняется; Радуйся, яко венец твой княжеский кровными каплями, яко камением чудным, украсил еси. Радуйся, святыи благоверный великий княже Георгие.

### **Кондак 11**

Пение ангельское совершашеся на небеси, егда безбожнии воины мечем усекнуша честную главу твою, стратотерпче святыи, и ты предал еси душу твою в руце Бога живаго, Егоже от юности возлюбил еси. Темже поминающе блаженное успение твое, с сокрушенным сердцем преклонше колена, прибегаем к тебе, святыи угодниче Христов, и молитвенно просим тя о еже молитися за нас ко Господу, да и мы сподобимся вкупе со Ангелы на земли живых пети Ему: Аллилуиа.

### **Икос 11**

Свет Божественныя благодати озари блаженнаго епископа Кирилла, да совершит молитву по убиенным воином на поли брани, и егда шед, обрете обезглавленное честное тело твое, святе Георгие, потом же и главу твою, и благоговейне принесши я во град Ростов, предаде погребению в соборном храме. Мы же, почитающе честная страдания твоя, за веру и Отечество претерпенная, величаем тя сице: Радуйся, живот твой на брани мужественно положивый; Радуйся, жизнь вечную в Царствии Небеснем получивый. Радуйся, венец княжеский вкупе со главою твоею неверным за ближия твоя оставивый; Радуйся, венец мученический от Царя Небеснаго приявый. Радуйся, яко тобою и до сего дне Отечество наше от врагов избавляется; Радуйся, дивный хранителю, от Бога всем нам данный. Радуйся, святыи благоверный великий княже Георгие.

### **Кондак 12**

Божественная благодать явися на тебе, святыи благоверный княже Георгие, и неизреченное чудо дивно открыся, егда бо пронесение святых мощей твоих во град Владимир совершашеся, вси людие со страхом и трепетом узреша, яко честное тело твое бысть цело, и отсеченная глава прильне к телеси твоему, яко не отсечена. Дивящися убо чудеси и преклоняюще колена, молим тя, угодниче Божий, испроси и нам недостойным благодать, и милость от Господа, да возможем богоугодно воспевати Ему хвалебную песнь: Аллилуиа.

### **Икос 12**

Поюще радостную песнь хвалы и благодарения Господу, прославльшему тя, святой княже Георгие, восхваляем и святых сродники твоя, вкупе с тобою нетленными мощами своими почивающих: святого князя Андрея, мученический венец приявшего, и святого князя Глеба, дивными подвиги просиявшего, и усердно молим тя с ними услышати хвалебное сие пение нас зывающих: Радуйся, великий княже Георгие, Престолу Царя Небеснаго предстояй; Радуйся, о грешнем роде человечеством молитву пред ним возносяй. Радуйся, от святых мощей твоих многая чудесная исцеления болящим источаяй; Радуйся, от страстей благодатию, данною ти от Бога, души наша свободяяй. Радуйся, яко тебе и святым князем Андрею и Глебу, сродником твоим, вернии всеусердно поклоняются; Радуйся, наша недостойная хваления благосердно приемляй. Радуйся, святой благоверный великий княже Георгие.

### **Кондак 13**

О преславный и святой угодниче, страстотерпче Христов, великий княже Георгие, вонми гласу моления нашего и ходатайством твоим испроси нам от Господа в жизни сей в вере и добродетелех утверждение, от ересей и расколов сохранение, от скорбей и напастей избавление, прегрешений наших прощение и в час смертный твердое спасения упование, да сподобимся Царствие Небесное наследовати и вечно воспевати Богу: Аллилуиа. Аллилуиа. Аллилуиа.

**(Этот кондак читается трижды, затем икос 1 и кондак 1)**